

Asim Hadžialić, diplomirani inženjer geodezije



Teška bolest je zauvijek od svih nas otrgla našeg Asima Hadžialića. Na vječni i bolji svijet, zajedno sa članovima porodice, prijateljima i bližom i daljom rodbinom ispratili smo ga u utorak, 18.06. 2019. godine na gradskom groblju Sutina u Mostaru.

Asim Hadžialić je rođen 06.04.1933. godine u Foči, Bosna i Hercegovina, u imućnoj trgovačkoj porodici. Otac mu je poginuo 1941. godine u Foči, kada su mnogi Fočaci kao nevine žrtve stradali. Ulaskom partizana u Foču, ista je oslobođena. Nakon oslobođenja, porodica Asima Hadžialića napušta Foču. Preseljavaju u Bosansku Gradišku gdje dočekuju konačni završetak Drugog svjetskog rata 1945. godine.

Poslije završetka Drugog svjetskog rata, Asim Hadžialić se zajedno sa svojom porodicom vraća u rodnu Foču. Po dolasku u Foču, gdje su zatekli sve razrušeno i popaljeno, mukotrпно su krenuli u obnovu kako bi stvorili minimalne uslove za normalan život.

Nakon završetka osnovne škole upisuje Gimnaziju u Foči gdje završava tri razreda, odnosno malu maturu. Kako u Foči još nije bilo viših razreda gimnazije, odlazi u Sarajevo gdje nastavlja dalje školovanje u višim razredima gimnazije. Gimnaziju uspješno završava 1953. godine. Poslije uspješno završene gimnazije, upisuje se na studij Geodezije na Arhitektonsko – građevinsko - geodetskom fakultetu Sveučilišta u Zagrebu.

Diplomirao je 1958. godine i dobio zvanje diplomiranog inženjera geodezije. Iste godine odlazi na stručno usavršavanje u Holandiju, gdje ostaje tri mjeseca. Po povratku u domovinu zapošljava se u Geodetskoj upravi Bosne i Hercegovine. Reorganizacijom Geodetske uprave Bosne i Hercegovine i stvaranjem Geodetskog zavoda Bosne i Hercegovine kao proizvodnog odjela, počinje raditi kao diplomirani inženjer geodezije u novoosnovanom Geodetskom zavodu Bosne i Hercegovine. U Geodetskom zavodu ostaje do 1964. godine.

Nakon uspješnog rada u Geodetskom zavodu, 1964. prelazi u Geodetsku tehničku školu u Sarajevu na poziciju nastavnika stručnih predmeta. Dužnost direktora Geodetske tehničke škole je preuzeo 1980. godine. Na mjestu direktora ostaje do 1990. godine kada se ponovo vraća na mjesto nastavnika stručnih geodetskih predmeta. Poslove nastavnika obavlja do 1993. godine kada odlazi u zasluženu penziju.

Asim Hadžialić je napisao više knjiga iz oblasti geodezije: **Geodezija** za 1. razred Geodetske tehničke škole, **Priručnik praktične nastave** za predmet Geodezija za 1. razred Geodetske tehničke škole, **Geodezija** za 2. razred Geodetske tehničke škole, **Priručnik praktične nastave** za predmet Geodezija za 2. razred Geodetske tehničke škole, **Geodezija** za 2. razred Građevinske

tehničke škole i **Račun izravnanja** za 3. razred Geodetske tehničke škole. Knjige se koriste širom Bosne i Hercegovine u srednjim građevinskim i geodetskim školama.

Teška situacija sa nastavnim kadrom na Odsjeku za geodeziju Građevinskog fakulteta u Sarajevu je bila razlog ponovnog aktiviranja penzionisanog Asima Hadžialića u pedagoškoj geodetskoj branši. U periodu od 1993. do 2000. godine aktivno je učestvovao u izvođenju nastave na Geodetskom odsjeku Građevinskog fakulteta Univerziteta u Sarajevu na predmetu Inženjerska geodezija.

Život je proživio u sretnom braku sa suprugom Amirom koja je bila nastavnica bosanskog jezika i historije, sa kojom je imao dva sina. Stariji sin Sabahudin je književnik (u Statusu Istaknutog samostalnog umjetnika u BiH), ali i doktor nauka iz oblasti medijskih i komunikoloških nauka uz počasni doktorat Univerziteta del Este iz Ciudad del Este u Paragvaju, a radi i kao gostujući profesor na univerzitetima u Italiji, Poljskoj i Litvaniji. Mlađi sin Armin je magistar inženjer građevinarstva sa vlastitom firmom za projektovanje i inženjering Higrakon d.o.o. u Sarajevu.

Asim Hadžialić je među kolegama iz struke bio zapažen kao veliki čovjek, krasan rukovodilac i sposoban stručnjak. Kao roditelj je bio čovjek koga su krasile najljepše ljudske i roditeljske osobine.

Armin Hadžialić

Sabahudin Hadžialić